


Prest a Sèn Jan na scolina renovèda e aldò di tempes

La Provinzia à deliberà la conzescion de n finanziament per poder meter man a la struttura del frabicat, oramai veie e no più a norma



I rendering moscia coche vardarà fora l frabicat dò i lurieres de ressanament.

Lurieres publics - L frabicat de la Scolina de Sèn Jan l'è de proprietà de la Gejia Romano Catolica de Sènt'Ugèna, l'è stat fat sù a la fin di egn '50 del secol passà e enaudà del 1960.

Ti egn '80 e '90 l'è stat fat doi intervenc parzièi per realisèr picoi smaoramenc a pe pian con chela de sodesfèr l besegn de spazies, senza ampò mudèr te la sostanza la struttura.

Te chesta scolina va i bec tant del comun de Vich che de chel de Poza, l numer muda tel temp e l pel passèr da 90 a 115, anchecondi l'è cater sezions con 105 bec.

L'è da n trat de temp che l'Ent gestor "Amici della Scuola d'infanzia di San Giovanni" vidà dal president Quirino Zulian, a una con la proprietà raprejentèda dal piovàn don Andrea Malfatti, l se n'adad che l'era besegn de intervegnir a na vida globala per ressanèr l frabicat, portan inant n lurier de recalificazion dal pont de veduda energetich e de adatament a la normative en दौरa.

La costruzion defat no l'è più bona de contentèr i besegnes de segurezza, funzionalità, sanità di locai e tel medemo temp de contegnir i cosc energetics ajache se sà ben, soluzions che jia ben acà 60 egn no les garata più anchecondi.

Per ch'est l'Ent gestor e la proprietà se à ativà per fèr lurèr fora n projet e ge domanèr a la Provinzia i finanziamenc pervedui.

L projet l'è stat lurà fora dal studie de architec Ghetta e Tamion da Vich e l pèrveit l ressanament de duta la struttura per la adatèr a la desvaliva normative de valuta en materia de edilizia scolastica e sparagn energetich, travers la recalificazion termica e tel medemo temp travers n picol smaorament, de ütöl enche acioche la aules per la didatica posse vegnir metudes a norma. I lurieres tol ite enche l nef endrez di spazies de fora, aldò de l'idea de spostèr i auti te n piazal sot tera e destinèr i spazies de sosta a zones verdes per i bec.

L projet no muda trop i volumes e i smaoramenc tol ite vèlch che l'era jà, la carateristiches di desvalives elemenc de fràbica vegn mantegnudes, tel medemo temp se vel recuperèr l livel del teren coche l'era al scomenz, a na vida che se posse goder di spazies che l'è de fora enlongia la aules.

L'intervent più emportant dal pont de veduda estetich l'è chel per l'isolament termich, che va a sconer i parees de porfir. Per motives funzionèi l cuert vegn endotà de elemenc che vanza fora acioche l'èga de la pievia posse se n jir a na vida più

sorida enche se l'è giacià, stravardan tel medemo temp enche la neva izolazion.

Amò apede l projet vel sottrissèr i desvalives volumes che fèsc pèrt de la costruzion travers la दौरa de colores, con chela de ge dèr n aspet più da jech, conscidrà la destinazion a scolina.

L projet l'è stat portà dant en Provinzia che, con determinazion nr

133 di 20 de dezember del 2016, l'à deliberà de conzeder n contribut de passa 1 milion e 200 mile euro, l'80% de la speisa ametuda che l'è de passa 1 milion e 600 mile euro. L rest del cost vegnarà scuert con ressorsces che ge vegn domanà a la istituzions locales.

I lurieres cognessa tachèr, se dut jirà dò sia strèda, d'uton del 2017 o d'aisciuda del 2018, con gran sodesfazion de duc chi che se à dat jù

per otegnir ch'est emportant resultat, che ge darà luster a chel raion olache troa post l più emportant pol scolastich de la val, con la neva scola d'èrt, la senta de la Sorastanza de la Scuola Ladina, i licees e la mesènes, n lech strategich vejin enche a la Pieif de Sèn Jan, a l'Istitut cultural ladin col Museo, l Comun general de Fascia, la Cèsa de Pausa, l distret sanitèr, la senta de l'Anffass e l Fascia Coop. (cri.m)



La Scolina de Sèn Jan anch'è la è veia e fora norma.